



Tuhaqtitauyughaq

Huratjanit Ahiruqtiqtailinikkut Akiliqtautjutillu Pinahuarutit Piyauliqtut Uplumi

Iqaluit, Nunavut (October 15, 2012) – Malruuk nutaak pinahuarutighak piyauliqtut uplumi tuniplugit Nunavunmiut pimmarigharutighanik inmingnut aanniqnaitjutighakkut ikikliyuummiqtirumaplugillu huratjatnit nanminiriyauyunik ahiruqtiqtinirnik.

Nunavut Kavamatkut Avatiliqiyiit atuqtipkaliliqtaa una Huratjanit Ahiruqtiqtailinikkut Pinahuaruti (WDPP) unalu Huratjanit Ahiruqtiqhimayunit Akiliqtaujutit Pinahuaruti (WDCP). Hapkuat pinahuarutit akihaqtuqpaktait inuit ilauyaanginnik pitqihikkut hulilukaarutini qayangnaiyarhugit inungnut huratjanunlu.

“Qayangnaiyarniit nunallaaptikni tamainnilu Nunavunmiunnut anginiqaqtuq,” uqaqtuq James Arreak, Minista Avatiliqiyitkunni. “Turaangninga hapkunani pinahuarutini aghuurhaiyaut nakuuyunik hulitjutighanik ikikliyuummiqtirnahuarnikkut pitjutinik ingattavallaangittaanginnilu nanminiriyauyunut ahirutirutinik. Havaqatigiikhimaluta pipkaqtittaaqtavut Nunavunmiut qauyihaqhimayut qayangnaitjutiqariami ingmiknut nanminiriyamiknunlu.”

Piliuqniit hapkunani pinahuarutini iniqtiqtauhimayut miitiqatigiplugit Anguhiqiyikkut Timiqutiit, uqautainninlu tamainnit nunallaanit. Avatiliqiyikkut uukturiirhimayut nakuuyunik haniqpani ahiruqtiqtailinikkut hanaqitjutinik ihumagiyullu hapkuat pinahuarutit nakuuyunik havagutiqarniaqtut pittailinikkut ingattaqtailinikkullu huratjatnit ahiruqtiqtinirnit.

Huratjanit Ahiruqtiqtailinikkut Pinahuaruti (WDPP) pipkainiaqtait inuit nunallaanilu timiqutit uktuqvikhamik maniliqtuutighanik ikayurutighat ahiruqtiqtailinikkut hanaqitjutighanik tamayaghaniklu. Aanniqtailinikkut hanaqitjutit tamayaghallu imaatut: alruyaqtuqtumik avalunik, alruyaqtuqtuq aghanik nanihitjutinik, aghanit angmaqtaulimaittunik tutquumavikhanik ukuallu aghanit angmaqtaulimaittunik iglulurutighanik tamayanik tamaita ilaayut uvani nutaami pinahuarutimi.

Huratjanit Ahiruqtiqhimayunit Akiliqtaujutit Pinahuaruti (WDCP) pipkainiaqtuq maniliqtuutighanik inungnut timiqutinunluunniit pihimavaktut ahiruqtiqtailinikkut hulitjutighanik kihimi huli hugaungirutiyaahimayut ahiruqtiqtauhimayullu nanminiriyamiknut. Angiqtauyaamik uvunga pinahuarutimi piyumaniq tuyuqtauyughaq tamaitalu piyumaniit naunaiyaqtauniaqtut ilikkuuqattarlugit.

